

金石三例

三  
墓銘舉上

墓銘舉例姓氏目錄

卷之一

韓文公

六十六首

李文公

九首

柳河東

二十七首

卷之二

歐陽文忠公

三十一首

尹河南

七首

曾南豐

十八首

王荆公

三十三首

蘇文忠公

九首

朱文公

二十首

卷之三



陳后山

三首

黃山谷

二首

陳了齋

七首

晁濟北

四首

卷之四

張宛丘

三首

呂成公

三首

凡爲文章務求得乎心之所安與其義之所止例非所  
重然誌銘爲史之餘體工匠削墨翹想般輪矧夫稱美  
墓銘舉例目錄終

發德與人以千秋者耶止仲所舉雖傷繁碎亦古曰在  
昔昔曰先民之意學者沈潛反復於是庶幾無偏規矩  
而改錯矣

## 手抄墓銘舉例跋



汪由敦

墓銘舉例四卷明長洲王行止仲所編錄也墓之有銘蓋慮夫隧之毀而人莫知其誰何故備書其姓名字世系官伐與卒葬之日月以識之俾見者有所考云爾其累舉生平行誼敘之以文而綴之以詩蓋盛於東漢之世顧其文類近於俳沿至六朝繁縟彌甚掇拾比擬牽傳成篇文之敝也曾弗若質言之之無失實也昌黎韓氏乃一以古文爲之嘗自負學老文鉅不若毀譽於人爲足以信今而傳後其辭之雅健亦駸駸與子長孟堅史傳相亞止仲之託始昌黎而敘錄河東以下諸家其見卓矣記曰愛之斯



錄之矣敬之斯盡其道焉耳孝子慈孫之致其愛敬者於  
是乎在而可冒焉馬之乎古之作者文成而法立屢變而  
不窮綜而次之條別同異而原其所自始譬夫製器者舉  
成器而按其方圓以得其尺度然後施墨而運斤焉不至  
偏規背矩而窳敗其器也庶幾矣甲辰之夏借得於吳門  
沈君穎谷手抄成帙漫書卷端

墓銘舉例卷之一

長洲 王 行 止仲

凡墓誌銘書法有例其大要十有三事焉曰諱曰字曰姓氏曰鄉邑曰族出曰行治曰履歷曰卒日曰壽年曰妻曰子曰葬日曰葬地其序如此如韓文集賢校理石君墓誌銘是也其曰姓氏曰鄉邑曰族出曰諱曰字曰行治曰履歷曰卒日曰壽年曰葬日曰葬地曰妻曰子其序如此如韓文故中散大夫河南尹杜君墓誌銘是也其他雖序次或有先後要不越此十餘事而已此正例也其有例所有而不書例所無而書之者又其變例各以其故也今取韓



漢魏額題  
皆簡古可  
法唐人則  
變古開新  
然唐人於  
詩題皆各  
有致意故

文所載墓誌銘錄其目而舉其例于各題之下神道碑銘亦舉之又于李文公柳河東二家之文拔其尤以附于後用廣韓文之例焉

韓文公文六十六首

墓誌銘五十三首

墓碣二首

殯表一首

神道碑銘十首

集賢院校理石君墓誌銘

右誌正例書也

故中散大夫河南尹杜君墓誌銘

書故而不冠以代者大本朝之義也

右誌正例書也詳書世胄重其族之大也又一例



所以題其  
文者亦不  
苟學者所  
宜識也今  
爲標別出  
之

也

太原參軍苗君墓誌銘

第書其今官簡也

右誌正例書也書季子生卒後紀實也不舉以為

例以非嫡長之重也

國子助教河東薛君墓誌銘

書官又書望唐重望也且著別也

右誌正例書也

唐故江西觀察使韋公墓誌銘

書故冠以代萬世之慮也

右誌正例書也詳書兩娶之父祖兩娶皆先卒故

于此見焉又一例也

唐正議大夫尚書左丞孔公墓誌銘

書所冠以代其人足以為一代有無也不書故省文也



誌銘爲萬世  
無窮之慮習  
間易知止於  
當代不可爲  
例

右誌正例書而稍變也

唐故昭武校尉守左金吾衛將軍李公墓誌銘

書守國故也

右誌不書姓宗室也元配書遠祖顯也又一例也

兩娶析書其子女又一例也 凡不書姓宗室

也名門也鉅族也貴戚也顯家也五者人所習聞而易知也五者之外又有已見于題而不書者蓋題實文之綱文固題之目綱既舉之在目有可畧之理此又不書姓之通例也然略其姓者其序族出多詳焉

中大夫陝府左司馬李公墓誌銘

書階而不冠以故與代



漢人碑版或稱府公或稱府君大抵刺史太守而故吏稱之以者舊爲例亦不盡然

右誌不書姓宗室也

唐故秘書少監贈絳州刺史獨孤府君墓誌銘

書贈又書府君者舊之義也

右誌不書姓名門也書妻之父祖顯也

柳子厚墓誌銘

專書字

朋友書字之例亦不盡然例者所以防濫也學者之事也非作者之業也

右誌不書姓名門也書子不書妻略也子厚初娶

楊憑女先十七年卒無子不果再娶子蓋微出

也又一例也題不書官其字重於官也又一例

也

唐故河南令張君墓誌銘

右誌不書姓名門也卒不書日略也

凡誌一作例之



所略者以非所重也。如書諱而不書字書卒而不書日書葬而不書地之類又一例也。

號州司戶韓府君墓誌銘

右誌不書姓名門也諱而不字略也詳其父而略

其身又一例也

書貶徙紀實也

唐故朝散大夫商州刺史除名徙封州董府君墓誌銘

右誌不書姓顯貴家也詳敘其弟賢之也又一例

也

此賜死而不書

唐故檢校尚書左僕射右龍武軍統軍劉公墓誌銘

貴公也

右誌不書姓顯貴家也書其子曰學于樊宗師重

紹述也又一例也

殿中少監馬君墓誌銘

右誌不書姓顯貴家也不書字卒不日葬不日不地不書妻重在敘其世舊故略也無銘詩亦略也然銘亦不必皆詩文卽銘焉耳又一例也

處士盧君墓誌銘

書處士

右誌不書姓略也書子不書妻或未娶也不然同柳子厚誌例也

書贈兼書望

故江南西道觀察使贈左散騎常侍太原王公墓誌銘

右誌不書姓略也特書母郡氏贈號又一例也



唐故朝散大夫尚書庫部郎中鄭君墓誌銘

右誌不書姓略也書母氏因事也析書兩娶之子

女同昭武校尉李公誌例也

崔評事墓誌銘

書官冠以姓略也

右誌不書姓略也書子而不書名亦略也誌中多

有之而不舉者不足以爲例也

故幽州節度判官贈給事中清河張公墓誌銘

右誌卒不日略也書妻之父祖以妻之孝順祇修

故詳其所自出又一例也

唐故朝散大夫越州刺史薛公墓誌銘

右誌書母氏因事也姓見銘詩中又一例也

河南少尹裴君墓誌銘

右誌姓見銘詩中同越州刺史薛公誌銘例也

施先生墓誌銘

書某先生

右誌不書字葬不日略也有子而書其寮買石誌

其墓雖紀實又一例也前既書韓

一作讎

某爲之辭

曰云云後又書系曰云云則所謂辭者誌也所

謂系者銘也不曰銘而曰系又一例也世系鄉

邑葬地見銘詩中又一例也題不書官而書先

生從諸生之稱也又一例也



考功員外盧君墓銘

右誌不書字卒不日略也書妻之父祖妻同葬也  
無銘詩亦略也此合葬誌也誌載夫人內德并  
及其父祖而題不書合葬此正例也無銘詩而  
題曰墓銘又一例也

襄陽盧丞墓誌銘

書官而錯以姓簡也

右誌不書字卒不日無銘詩略也官則連父祖之  
官書于誌中諱又連父祖之諱書于誌末又一  
例也

試大理評事王君墓誌銘

書試存國故也

右誌不書字略也

故太學博士李君墓誌銘

右誌不書字不書族出無銘詩略也重在論服食而致誠也又一例也

登封縣尉盧殷墓誌銘

書名而冠以其官

右誌不書字不書族出無銘詩略也題書其名又一例也

唐故河南府王屋縣尉畢君墓誌銘

右誌不書字略也

故貝州司法參軍李君墓誌銘



右誌遠書世系而不書父不書壽年卒不日無銘  
詩略也重在紀其世著其德識其葬也舉三綱  
而後目之又一例也曰壙曰墳曰窆各謹書其  
日又一例也

李元賓墓誌銘

右誌不書族出卒不日葬不日不書妻子客葬略  
也云書石以誌則非刻石也雖紀實又一例也

南陽樊紹述墓誌銘

書字又書塋有名也

右誌卒不日葬不日不地不書妻子重在論其文  
故略也題不書官同柳子厚誌例也

興元少尹房君墓誌銘

右誌卒不日略也

唐故虞部員外郎張府君墓誌銘

右誌書母封因事也卒不日葬不日無銘詩略也

韓滂墓誌銘

但書名不官不字

右誌卒不日葬書既歛七日而不書其日略也

鳳翔隴州節度使李公墓誌

右誌書母封氏因事也書妻之父祖以妻賢有法

度故詳其所自出同幽州節度判官清河張君

誌例也

妻賢詳其所自出不賢則不詳所以勸婦順昭女美也



殿中侍御史李君墓誌銘

右誌書母氏因事也

貞曜先生墓誌

書私諡而不官不姓

右誌書母氏因事也題不書官與姓而書先生從諡者之志尊之也又一例也

河南少尹李公墓誌銘

位不穹而以公書之亦尊也

右誌特書母郡氏同江南西道觀察使太原王公誌例也書妻之曾祖以其有大名且妻同葬也而不及其父略也

唐故國子司業竇公墓誌銘

右誌詳敘其兄弟所歷官以其皆有才名又一例也世系見銘詩中同施先生銘例也

唐朝散大夫贈司勳員外郎孔君墓誌銘

右誌詳書敘其兄弟同國子司業竇公誌例也

唐河中府法曹張君墓碣銘

右碣書妻之父祖以其世有衣冠且因妻之辭以銘故詳其所自出同幽州節度判官清河張君誌例也無銘詩略也

清河郡公房公墓碣銘

書簡也

右碣卒不日葬不日不地略也書子不書妻或未



娶也不然同柳子厚誌例也

監察御史元君妻京兆韋氏夫人墓誌銘

書夫官書族望書氏書夫人詳也

右誌書母之父祖顯也又一例也書夫之履歷誌

一作論婦人之通例也子女見銘詩中又一例也

息國夫人墓誌銘

書封不氏顯也以國封婦人之極遇也

右誌不書諱婦人重在姓故或略之也又一例也

銘書其夫男女七人而惟敘夫人所生之男女

詳嫡而略庶又一例也題書封而不書氏榮其

封也又一例也

楚國夫人墓誌銘



右誌銘不書諱題書封而不書氏同息國夫人誌

例也世系見銘詩中同施先生銘例也

扶風郡夫人墓誌銘

非國封而不氏郡亦尊封也

右誌銘不書諱題書封而不書氏同息國夫人誌

例也卒不日葬不地略也

河南緱氏主簿唐充妻盧氏墓誌銘

書夫名著別也書氏不書夫人夫官卑無封故也

右誌書母氏因事也題書其夫名又一例也

四門博士周况妻韓氏墓誌銘

右誌書母氏因事也卒不日葬不日

一作卒葬皆不日

略也

題書其夫名同緱氏主簿唐充妻盧氏誌例也



河南縣令韓愈乳母李氏墓誌銘

書所乳之名示所以銘也且有名則顯之也

右誌不書族出微也又一例也無銘詩略也臨邛

韓氏曰葬乳母而為之銘自公始也又一例也

女孥壙銘

書女書名未嫁之辭也施之卑幼而宜者也

右題書壙銘又一例也

河南府法曹參軍盧府君夫人苗氏墓誌銘

先書夫人後書氏

右誌序略而銘詳又一例也

試大理評事胡君墓銘

右銘無序又一例也

盧渾墓誌銘

右銘無序同大理評事胡君銘例也銘惟吉當祿慰

之辭無所序述又一例也題書其名非例也適

其可也

書名也無所敘述非賢也銘之義稱美而不稱惡雖不賢而不可取也告慰之可也

施州房使君鄭夫人殯表書其夫之官與姓又書夫人

右表實銘詩也銘宜詩而墓表一作銘有用文者表宜

文而此表乃用詩焉皆變例也殯而有表又一

例也

曹成王碑

別書四大字簡也官階勳爵不勝書則從其重也

右碑不書卒日葬日不書妻略也 凡墓碑皆立

于既葬之後如此碑之立王薨已二十五年蓋



葬時已自一無有誌矣。故特書其大者耳。大者謂

世系也。名行也。功業也。

唐故相權公墓碑

書代書故書官書公簡也亦詳也以姓配公而尤著足以爲一代有無者也

右碑正例書也。官位爵諡也。所宜詳焉。此墓碑之

例也。

唐銀青光祿大夫守左散騎常侍致仕上柱國襄陽郡王

平陽路公神道碑銘

書階書官書勳書望而書致仕又書封爵焉紀實也書之尤詳者也

右碑正例書也

司徒兼侍中中書令贈太尉許國公神道碑銘

書官書贈書爵而不書姓顯也

右碑正例書也。書母氏封因事也。書母之兄以少



依舅氏故也題書官封而不書姓又一例也

唐故河東節度一本此下有使字觀察使滎陽鄭公神道碑文

右碑正例書也書母郡氏因事也銘而曰系同施

先生銘例也不用詩而議論以感歎焉又一例

也

唐故江南西道觀察使中大夫洪州刺史兼御史中丞上

柱國賜紫金魚袋贈左散騎常侍太原王公神道碑銘官階勳爵備而又書恩詳也

右碑正例書也凡神道碑銘與墓誌銘有不同

者墓誌銘宜簡而要神道碑銘宜雅而詳以太

原王公神道碑銘與太原王公墓誌銘劉統軍



碑與統軍劉公墓誌銘考之可見也

劉統軍碑

右碑詳書階官封爵食邑贈官于敘事之首以其  
所終者始之所以侈其榮也又一例也而銘詳  
序略序所宜敘者銘中銘之又一例也

李文公文九首

墓誌銘七首

神道碑二首

唐故福建等州都團練觀察處置等使兼御史中丞贈右  
散騎常侍獨孤公墓誌

書等統辭也意所簡也

右誌不書姓名門也書父諡而不書諱又略例之



書子之義以著代也義繫於父也微出之子不書母重嫡也示微不敢有其子也

變也云未仕而夫人卒則妻卒幾二十年矣而

書子生九歲則子蓋微出也又一例也比韓文

柳子厚誌例此尤著明也

故處士侯君墓誌

略其官不書書處士作者之特筆也

右誌不書族出壽年卒日葬日不書妻無銘詩略

也重在敘其意氣文辭也君嘗仕矣而題書處

士者蓋三縣皆攝仕猶不仕不足以挽其高也

又一例也

兵部侍郎贈工部尚書武公墓誌

右誌既書丁尊夫人憂再期服除又書母夫人暴



卒則所謂母夫人蓋其生母也按韓文墓誌無書生母者而此書之又一例也然亦因事非特書也

故河南府司錄參軍盧君墓誌銘

右誌不書姓名門也書卒日而不書年書葬而不書日略也

叔氏墓誌

不氏同姓故也不名爲尊諱也

右誌序略而嚴重在書其葬日也書于茲而不書其地卽其地以實之也又一例也銘惟哀其野殯與慰其客葬之辭無所敘述同韓文盧渾誌



例也

故懷州錄事參軍武氏妻傅氏墓誌 書夫氏

右誌不書諱同韓文息國夫人誌例也無銘詩權  
葬略也題書其夫不曰君而曰氏又一例也

故朔方節度掌書記殿中侍御史昌黎韓君夫人京兆韋

氏墓誌銘

既書其夫之望又書婦族焉唐人重門閥合以著其兩姓之好也

右誌書夫人姓京兆韋氏冠姓氏一作字于鄉邑之上

而以氏次之又一例也不書諱同武氏妻傅氏

誌例也書弗克祔于夫之族而依于女子氏之

黨紀實也然非禮也故曰權道也且將有待也



又一例也

唐故特進

左一作右

領軍衛上將軍兼御史大夫平原郡王贈

司空柏公神道碑

書官與爵與贈而冠以勳勳重也

右碑葬不日略也

唐故橫海軍節度齊棣滄景等州觀察處置等使金紫光祿大夫上柱國貝郡開國公食邑二千戶贈左僕射傅公

神道碑

官階勳爵既備書矣又書其邑戶焉詳之彌詳也題詳而文則略也非廢也

右碑題書官階勳爵甚詳而序多略又一例也蓋

題爲綱文爲目綱既詳之而目則略者嫌于辭之繁也其綱舉其要而目致其詳者如韓文唐



故河東節度觀察使滎陽鄭公神道碑文之類是也。然綱略而目詳者其常綱詳而目略者其變故曰又一例也。按神道碑其題有二。有碑額之題。有碑文之題。碑額之題簡。碑文之題詳。蓋旣題其額。又題其文也。故韓文有錄其碑額之題者。有錄其碑文之題者。碑額之題如曹成王碑。劉統軍碑之類。碑文之題如唐銀青光祿大夫守左散騎常侍致仕上柱國襄陽郡王平陽路公神道碑銘。唐故江南西道觀察使中大夫洪州刺史兼御史中丞上柱國賜紫金魚袋



贈左散騎常侍太原王公神道碑銘之類是也

若蘇文忠公所謂碑身上更不寫題古一作制如

此又謂碑只用大額向下小字直寫文辭不須

寫題目者施于宸奎閣碑與經藏碑耳非謂墓

碑也公又嘗與人簡云墓表小字亦有題目額

上不當復云墓表故別寫四大字也以此推之

墓碑用兩題可見矣 墓碑銘始于漢洪适隸

釋所載俱有額無題惟樊安碑首行有題無額

額字有多至二十餘字者題額之簡非例也既

題額又題文亦非例也文忠實通言之耳別寫

四大字者變也

柳河東文二十七首

墓誌銘一十三首

墓碣二首

權厝誌三首

誌殯一首

續墓誌一首

墳記一首

墓輒記一首

墓誌石蓋文一首

墓表二首

墓版一首

神道表一首

書使

唐故邕管經略招討等使朝散大夫持節都督邕州諸軍事守邕州刺史兼御史中丞賜紫金魚袋李公墓誌銘



右誌世系用宗法書以其代有土田也又一例也  
故試大理評事裴君墓誌

右誌三代以昭穆書又一例也書未果娶而書男  
子二人女一人則男女微出也又一例也比韓  
文諸不書妻例此尤著明矣

故秘書郎姜君墓誌

右誌不書妻而書子某母曰雷姬此墓誌中書妾  
媵例又正例之再變也

此用漢書體詳也非例也  
非例而可以爲例者也

故襄陽丞趙君墓誌

右誌敘其履歷甚略重在書其子之協卜而得殯

所以著其孝感也

單季子墓銘

書次

右銘例所宜有皆略之重在序其著書與歎其不顯也

東明張先生墓誌

書所居

右誌不書字不書壽年書卒之歲月而不日略也按韓文無書生者此書生天寶又一例也然因其命弟之辭又不著其歲非特書也題繫其所居而書先生非例也學黃老者之常稱也

箏郭師墓誌

書所業



右誌序之所敘重在其善音也壽年葬日見銘詩  
中同韓文施先生銘例也書其藝于題之端又  
一例也

亡友故秘書省校書郎獨孤君墓碣

書前

右碣詳記其友之知名者于後與先君石表陰先  
友記其意又一例也無銘詩略也題書亡友以  
表之又一例也

故御史周君碣

右碣惟敘其以諫而死一事此所謂立石者也他  
非所重故多略也

先太夫人河東縣太君歸祔誌

書稱謂書歸祔

右誌銘其母之葬也無銘詩非略也不忍詩而銘之也又一例也題書歸祔又一例也

伯祖妣趙郡李夫人墓誌銘

書稱謂

右誌不書諱同韓文息國夫人誌例也既敘其世系族出矣又書其夫之世系族出特加詳焉蓋婦人以從人爲貴內夫家故敘夫姓爲尤備又一例也

叔妣吳郡陸氏夫人誌文

右誌書諱又書字正例之備者也不書其夫之諱



蓋已表其墓而書之矣故誌末云恭惟仲父之  
諱與夫人之爵齒備于版文今不書懼再告也  
然韓文誌婦人亦不皆書其夫之諱則又其通  
例也無銘詩略也

朗州員外司戶薛君妻崔氏墓誌

右誌詳書其夫之世系族出同伯祖妣趙郡李夫  
人誌例也先書其夫之他姬子男某女某後書  
其子男某女某所以別先後明嫡庶也又一例

也

趙羣秀才墓誌

書名而綴之以秀才唐人詩題例

右誌銘而不序同韓文試大理評事胡君銘例也

題書其名雖非例亦韓文盧渾墓銘之類也

故永州刺史崔君權厝誌

書權厝

右誌旣書二孤溺死又云今尚有五丈夫子則子

蓋七人也而惟二孤書名權厝略也族出諱字

壽年見銘詩中同筭郭師誌例也權厝有誌又

一例也

故連州員外司馬凌君權厝誌

右誌不書族出不書壽年不書葬日權厝略也

誌從父弟宗直殯

書誌殯



右誌卒不書日而云元和十年七月病又云是月

二十四日殯死七日矣以七日與二十四日推

一作權之則卒日可見矣又一例也誌某人殯又一

例也

續滎澤尉周當作崔君墓誌

書續誌

右誌題書曰續蓋以續太傅崔鑿祐甫之辭也故

惟敘其緩葬之故與著其終事之年月日而他

不之及也按韓李文無所謂續誌者而此有

焉又一例也無銘詩非略也無所事于銘也又

一例也



亡姑渭南縣尉陳君夫人權厝誌

書亡姑書權厝

右誌不書諱同伯祖妣趙郡李夫人誌例也特書

母郡氏同韓文故江南西道觀察使太原王公

誌例也無銘詩略也

韋夫人墳記

書墳記非大葬也志必遷也

右記云祔而不合大葬未利以俟蓋實權厝誌也

其辭甚略而惟詳其期之年月日又一例也題

書墳記又一例也

小姪女子

一無

墓甄記

未嫁例不氏也無名故不名也

右記實銘詩也而無序同趙羣秀才誌例也題書



墓輒記又一例也

亡姊崔氏夫人墓誌蓋石文

書蓋石猶之碑陰銘陰也

右文云敢附碑陰之義假蓋石以書其辭則非正例也其爲婦爲妻爲母之道良人旣爲之誌而銘之矣故惟敘其自知幼以至于笄之一作誌爲女之道焉又一例也

唐故給事中皇太子侍讀陸文通先生墓表

書職書私諡

右表議論以發其端而敘爲春秋之學者互相排詆所以歎聖人之難知而著其春秋集註爲有功也又一例也略其履歷者非所重也按此



例蓋以其所專重者不可不詳故于其不必兼  
詳者不得不略又略例之大者也韓文凡四殿  
中少監馬君誌太學博士李君誌云云見補闕

故宏農令柳府君墳前石表辭

漢人立石柱以表墓而刻文於其柱此其例也

右表詳序其大墓昭穆之位又一例也書妻之父

祖妻同葬也

故叔父殿中侍御史府君墓版

書墓版

右名

一作書

墓版其實表也首敘世系同韓文諸神通

碑例也其敘德履云其在閨門也其在公門也  
則綱而目之云修己之大經也從政之大略也



孝如方輿公文如吳興守正如衛太史清如魯士師則目而綱之又一例也

先侍御史府君神道表

書先書神道表

右表首敘世系同叔父府君墓版例也曰神道表又一例也表陰記其先友自袁高至張宣力凡六十七人其末書云先君之所與友凡天下善士舉集焉信讓而大顯道博一作傳而無雜今之世言交者以爲端敢悉書所尤厚者附茲石以銘于背同亡友獨孤君碣例也蘇文忠公云先友六十七人考之于傳卓然知名者蓋二十八焉



非例止於此也漢魏六朝年代在先文非不古也不可以爲法則勿例也

邵太史云子厚欲著其父雖不顯所交游者皆天下善士故列其姓名官爵云

右唐文三家凡九十八首七十二例

按墓銘一作誌不始于唐而今舉唐人以爲例者何也。以八代之衰又不足以據也。夫銘者論撰其先祖之有德善功烈勳勞慶賞名聲以列于天下者也。雖銘之義稱美而不稱惡以盡其孝子孝孫之心。然無美而稱之是誣也。八代之文靡矣。其能免于誣乎。若韓子其文與史遷相上下而理則過之。其所論撰得其正矣。今不取之以



爲法將何所法哉。既取韓文以爲法，非李柳之  
文又無可以附于韓。此所以舉三家以爲之例  
也。

比自考訂之說興，人人漢魏家家，金石薄唐以後，文爲  
無足觀。薄宋以後，人爲孤陋寡聞，而文律且蕩然矣。文  
墓銘舉例卷之一終

章之用莫盛於唐，以唐爲本，則上收漢魏，下取宋元，凡  
其不足法者，不必例而文已不可勝用矣。此非騫博廣  
侈之事，正以嚴潔爲義者也。



墓銘舉例卷之二

長洲王行止仲

文自東漢之衰更八代而愈下至唐韓文公始振而起之

韓柳之外若元結孫樞劉禹錫亦學聲成家非皇甫湜一流

以復于古焉韓文公既為之倡同時和之者惟李文公柳

諸雜家可此

柳仲塗實在其先

河東而已後二百年至宋之盛始復得穆參軍蘇滄浪歐

同時若廖父貢父一劉氏實能自拔於歐曾

陽公尹河南相與漸而繼之而歐公其傑然者當時文風

蘇王之外小可以將甚視之亦非于美伯長比也

實為之變從而和之者日以浸盛而南豐曾氏臨川王氏

當以歐陽州小集為最

眉山蘇氏出矣南渡以還斯文之任則在考亭焉今墓銘

一作誌既舉韓文為之例而閒取李柳之文廣之矣故復取歐

誌

公而下數公之文之尤粹者附于後蓋以廣三家之例也

韓以前亦有可  
以為例者秦漢  
石刻即昌黎碑  
版所從來晉宋  
之文亦自有法  
故韓以前文不  
可以例言而實  
例之所出耳  
北宋之季畢  
仲游實能繼  
起歐曾之流  
風  
南宋以後文家  
如麻似粟其必  
不可廢者元遺



山虞道園姚牧庵三家其閒契丹語蒙古語官名地名人名非此無例可援居今日而言文自不能專用韓歐法盡之明自宋金華以後亦各有勑作如震川壽序在古人無是文而今日有是體勢亦何能無取

歐陽文忠公文三十一首

墓誌銘一十八首

墓碣一首

石槨銘一首

墓表三首

阡表一首

神道碑銘六首

塔記一首

鎮安軍節度使同中書門下平章事贈中書令諡文簡程公墓誌銘

右誌特書三代妣氏封按唐三家墓誌無書三代妣者而公多書之又一例也

張子野墓誌銘



右誌特書三代妣氏封同文簡程公誌例也題不  
書官以其魁傑賢豪位不足以稱其才志同韓  
文柳子厚誌例也

尚書都官員外郎歐陽公墓誌銘

書姓誌以貽後世非以告世  
時不敢不書也

右誌三代皆以廟室書又一例也

資政殿學士尚書戶部侍郎簡肅薛公墓誌銘

右誌序首旣正書三代贈官已序末復舉之而詳  
三代妣氏之封焉又一例也

太子太師致仕杜祁公墓誌銘

冠姓於爵亦簡也

右誌首書其世系之詳者以春秋諸侯之子孫歷



秦漢千有餘歲。不絕其世譜。而唐之盛時。公卿家法猶存于今者。惟杜氏同韓文。故中散大夫河南尹杜君誌例也。

尙書職方郎中分司南京歐陽公墓誌銘

雖同姓爲文無有不書姓萬世之禮也

右誌序末書世系自得姓始。歷敘其由漢而唐。以至高曾三代甚詳。而遠者蓋兄子自銘其叔父。故尤謹其家世也。又一例也。

尙書虞部員外郎尹公墓誌銘

右誌特書母氏封同韓文。江南西道觀察使太原

王公誌例也。



贈尚書度支員外郎張君墓誌銘

右誌特書母氏封同虞部員外郎尹公誌例也姓

見銘詩中同韓文唐故朝散大夫越州刺史薛

公誌例也

徂徠先生墓誌銘

書先生學者稱之而天下共與之也不官實錄重也不姓不待姓而著也

右誌書妻而不書氏略也先生非隱者其仕嘗位

于朝矣而題不書其官者以先生魯人之所尊

故因其所居之山以配其有德之稱德重于其

官也不書姓姓有不待書也

不書姓謂題不書姓序固云姓石氏也

尹師魯墓誌銘

此與梅聖俞皆朋友書字之義且位不副德官不足書也



右誌不書族出以嘗銘其父之墓而已詳之也卒  
不日略也題不書官以其名重當世天下之人  
識與不識皆稱之曰師魯故也又一例也

梅聖俞墓誌銘

右誌首敘其病死之詳重其交游之盛也特書兩  
母封氏又一例也題不書官以字書武夫貴戚  
兒童野叟皆能道其名字同尹師魯誌例也

太子中舍人王君墓誌銘

右誌卒不日略也詳于敘其子之好學有成也世  
系歷官壽年見銘詩中同韓文施先生銘例也



南陽主簿黃君墓誌銘

右誌首書亡友以表之同柳文亡友獨孤君碣例而稍變也

河南府司錄張君墓誌銘

此一人為誌  
一人為銘之  
例

右誌題下書曰山東道節度使掌書記知伊陽縣事天水尹洙撰而序末書云渤海歐陽修為之銘又張君改葬墓碣亦曰河南尹師魯誌其墓盧陵歐陽修為之銘則此誌序乃洙為之銘則公為之也兩人共為一誌又一例也

南陽縣君謝氏墓誌銘

書封書氏而不書夫官本息國夫人之例而變也



右誌不書諱同韓文息國夫人誌例也書其兄以時之聞人同韓文國子司業竇公誌例也

長安郡太君盧氏墓誌銘

右誌不書諱同南陽縣君誌例也專論五福而夫人之履歷具焉又一例也銘辭嚴書葬日葬地而不詩又一例也

李夫人墓誌銘

不書夫人

右誌不書諱同南陽縣君謝氏誌例也

右監門衛將軍夫人李氏墓誌銘

書夫官不書夫姓以夫固宗室不待書也

右誌不書夫姓宗室也



河南府司錄張君墓碣

右碣為其改葬而作他無所述獨敘其久故之情而致感歎之意者以嘗銘其墓也又一例也無銘詩非略也蓋雖曰碣實表也又一例也

母鄭夫人石槨銘

書石槨凡銘題之所有而墓誌之所無也

右石槨有銘又一例也書作槨之日而系以銘又一例也

一例也

胡先生墓表

重其人者不在官故書先生以姓配先生而已著并不必如得祿先生之冠以號也 杜祿先生二方之辭也 施先生胡先生天下之辭也

右表略其族出官邑履歷者重在敘其尊師道立教法以成人才同柳文陸文通先生表例也題

漢孔耽碑書  
并作畜柳畜  
柳者壽柳也



不書官以天下後世尊先生者不在其官同徂  
徠先生誌例也

### 石曼卿墓表

右表其序不書葬日而書既卒至葬之日數又一  
例也其表無所敘述而皆議論感歎之辭同韓  
文滎陽鄭公碑例也題不書官以其自顧者重  
官不足以稱之同張子野誌例也

### 連處士墓表

書某處士

右表不書壽年卒不日不書妻略也重其以一布  
衣終于家而鄉里之人久復思之故致詳于其



德履也

瀧岡阡表

此別書四大字例而標以地不敢斥尊也亦本於漢碑額書安西道表

右表其先君之墓道也。而題以地書變例以致其尊也。嚴書立表之歲月朔日甲子重之也。詳書已之勳階官爵封號食邑。所以著先德之所致也。亦皆變例也。

守太尉文正王公神道碑銘

簡法

右碑首謹詳奉勅之辭。而後序次其事。賜碑之正例也。詳書賜號階官勳爵食邑贈諡于敘事之首。以其所終者始之。所以侈其榮。同韓文劉統



軍碑例也

鎮安軍節度使同中書門下平章事贈太師中書令程公  
神道碑銘

右碑首謹詳奉勅之辭而後敘次其事同王文正  
公碑例也

觀文殿大學士行兵部尙書西京留守贈司空兼侍中晏  
公神道碑銘

右碑首謹詳奉勅之辭而後敘次其事同王文正  
公碑例也

資政殿學士戶部侍郎文正范公神道碑銘



右碑不書姓名門也世次官爵皆不書書其繫天下國家之大者又一例也

太子太師致仕贈司空兼侍中文惠陳公神道碑銘

右碑題書贈官而序不書序書封爵而題不書又

可以互見省文也

一例也詳書兄弟之官同韓文國子司業竇公誌例也三代贈封皆以公恩今書其爵土階官而不曰贈又一例也

袁州宜春縣令贈太師中書令兼尚書令冀國公程公神

道碑銘

書子贈仍繫原官

右碑無大功德可書故歷敘其因子而累贈之官

封及詳書其氏系世德三代考妣又一例也

明因大師塔記

書僧塔例

右記爲浮屠氏作也而無一語及其法者此誌浮屠之正例也卒不日葬不日略也按唐三家墓銘無書生年日者柳文東明張先生誌雖書生天寶而不著其年此書生年又一例也

尹河南文七首

墓誌銘七首

故宣德郎守大理寺丞累贈司封員外郎皮公墓誌銘

贈書

右誌書國子贈官不曰贈某官而曰得以某官告



其第又一例也

故贈祕書丞左君墓誌銘

書贈官不書原官重贈也

右誌書贈官不曰贈某官而曰追命爲某官又一

例也書其妻追封不曰追封而曰以某封告第

同故宣德郎皮公誌例也

故將仕郎守瀛州樂壽縣尉任君墓誌銘

右誌銘不以詩而論禮以識過期不葬且辯君之

葬不在所譏同韓文滎陽鄭公碑例也

故金紫光祿大夫檢校右散騎常侍降授右一作左監門衛將

軍持節集復惠州諸軍事惠州刺史兼御史大夫輕車都尉



隴西郡開國侯食邑一千七百戶李公墓誌銘

書檢校書持節書兼官

右誌題書階官勳封食邑甚詳而序多略同李文

唐故橫海軍節度贈右僕射傅公碑例也

已詳於題則序可略也

故推誠保德功臣金紫光祿大夫守太子少傅致仕上柱

國天水郡開國公食邑四千二百戶實封

集賢實封

一千戶趙公

墓誌銘

官階勳爵無所不書又冠之以賜號備國制也

右誌不書葬日而書自卒至葬之日數同歐文石

曼卿表例也題書賜號階官勳封食邑甚詳而

序多略同降授右監門衛將軍李公誌例也

故大中大夫尚書屯田郎中分司西京上柱國王公墓誌



銘

右誌書葬地曰葬某所不從于先君用卜吉也又

一例也題書階勳而序略同降授右監門衛將

軍李公誌例也銘不以詩而論一論上有斷字以望之同

故將仕郎任君誌例也

故三班奉職尹府君墓誌銘

右誌銘辭嚴書葬地而不以詩同歐文長安郡太

君盧氏誌例也

會南豐文一十八首

墓誌銘一十五首

神道碑銘二首

塔銘一首

試祕書省校書郎李君墓誌銘

右誌書其先則詳其世系而敘其歷代之顯人書其後則及于曾玄而敘其四世之蕃衍此正例之尤備者也。

虞部郎中戚公墓誌銘

右誌議論以發其端而致感歎一作慨之意者以著其

家世學行之美同柳文陸文通先生誌例也前既敘其二世父子兄弟之出處矣後復詳其氏之自出與其鄉里之遷徙焉又一例也



張久中

一作文仲誤

墓誌銘

右誌書未娶

一此下有不日未娶四字

而敘其所以未娶之故而

未娶見焉又一例也

胡君墓誌銘

右誌卒不日葬不日不書壽年略也而書其生之

年同歐文明因大師塔記例也

劉伯聲墓誌銘

右誌詳其性資問學而略其履歷者重在敘其久

故之情也題不書官官不稱其學而字重于其

官同韓文柳子厚誌例也

殿中丞監揚州稅徐君墓誌銘

書官書使

右誌詳敘其所自出者所以著盛衰之不可常而深致感歎之意也又一例也

王容季墓誌銘

右誌書母之父顯也同韓文京兆韋氏夫人誌例也詳書其諸兄以其皆有才學同韓文國子司業竇君誌例也

此例亦本於漢碑

都官員外郎胥君墓誌銘

右誌書其子乞銘云祕閣校理裴煜以茂諶之疏來請銘按唐三家及歐尹書乞銘皆曰以狀而



此日以疏雖紀實又一例也

光祿寺丞通判太平州吳君墓誌銘

散官帶職內外兼書國制存焉爾

右誌首云龍圖閣直學士給事中吳仲庶具一作書

載其子業官世行治屬余曰吾子某不克壽不

得見其志希得銘信後世則某其不泯泯尚足

以慰吾思也按唐三家及歐尹墓銘無書其父

具載子之官世行治乞銘者此雖紀實又一例

也

壽安縣君錢氏墓誌銘

右誌首敘其夫自處之高者所以著君之能相之

也不書諱同韓文息國夫人誌例也

永安縣君謝氏墓誌銘

右誌不書葬日而書既卒至葬之日數同歐文石

曼卿表例也

永興尉章佑妻夫人張氏墓誌銘

書妻又書夫人

右誌題書其夫之名同韓文緱氏主簿唐充妻盧

氏誌例也

江都縣主簿王君夫人曾氏墓誌

夫姓婦姓並書之

右誌不書諱同壽安縣君錢氏誌例也葬不日無

銘詩略也



亡妻宜興縣君文柔晁氏墓誌銘

冠字于氏特筆創例也

右誌題書文柔晁氏按唐三家及歐尹墓銘書法無以字冠于氏者此冠氏以字變例也誌婦人而題書其字又一例也

二女墓誌銘

書二女統辭也同葬不別誌也

右誌無銘詩略也

太子賓客致仕陳公神道碑銘

右碑敘事而書其辭曰云云同韓文施先生銘例也

刑部郎中張府君神道碑

右碑銘不以詩而論以歎美之同韓文滎陽鄭公  
碑例也

寶月大師塔銘

右銘爲浮屠氏作也而略無一語及其法者同歐  
文明因大師塔記也

王荆公文三十三首

墓誌銘二十四首 墓表四首

神道碑銘五首

尚書

集無尚書字

度支郎中葛公墓誌銘

右誌敘履歷既總舉所閱一作歷之官以綱之矣敘政



業又各舉所居之職以目之同柳文故叔父府君墓版例也壽年以甲子書又一例也

王逢原墓誌銘

右誌論之詳者美其行之修一作備而足以有功于世

也敘之略者蓋悲其年之短而他有所不足書也又一例也書葬日而不書卒日非略也自葬日而以所計九十三日逆推之卒日自見同柳文宗直殯誌例也書子而曰妻方娠未知其子之男女雖紀實又一例也

王深父墓誌銘

雖兄弟無不書姓

右誌論詳序略同王逢原誌例也題不書官仕非其志也又一例也

節度推官陳君墓誌

右誌議論以發其端而致感歎之意者深惜其有材與志而無其年同柳文陸文通先生墓表例也不詳其履歷非所重也

叔父臨川王君墓誌銘

雖叔父書君又書姓告後世之辭也  
漢碑之書其父皆曰君楊孔君諸碑可按

右誌書父而不書諱集云余叔父諱師錫字某略也詳敘

其為善而不得職所以深致一作其悲也又一例

也



贈光祿少卿趙君墓誌銘

右誌書死節之綱于首而後詳其履歷先所重也

又一例也

都官郎中致仕周公墓誌銘

右誌卒不日葬書年而不日略也

屯田員外郎邵君墓誌銘

右誌書母氏因事也卒不日不書壽年略也

金溪吳君墓誌

書姓冠以地

右誌書子不書妻或未娶也不然同韓文柳子厚

誌例也諱字世系

一作諱字氏系  
又作諱氏字系

見銘詩中同韓文

施先生銘例也

太常博士曾公墓誌銘

右誌卒不日葬不日略也書生年同歐文明因大師塔記例也銘不以詩而論以足序意同尹文故將仕郎任君誌例也

胡君墓誌銘

專書姓

右誌書生年同太常博士曾公誌例也不書妻或

未娶也不然同金溪吳君誌例也壽年見銘詩

中亦同吳君誌例也

尚書度支員外郎郭君集墓誌銘



右誌特書母氏封同韓文太原王公誌例也世系

見銘詩中同金溪吳君誌例也

孔處士墓誌銘

右誌敘其有致仕官矣有贈官矣而題書處士同

李文處士侯君誌例也

**書官更書字**

祕閣校理王平甫墓誌

右誌書母封因事也無銘詩略也

泰州海陵縣主簿許君墓誌銘

右誌卒不日略也

馬漢臣墓誌

集墓誌銘

右誌不書壽年而云冠五年矣則壽年可知也又

一例也葬月一作誤而不日不書妻子無銘詩略也

謝景回墓誌

右誌書卒不曰卒曰終而曰棄世又一例也

廣西轉運使李君墓誌銘

右誌書葬地而曰君所自為壽藏按唐三家及歐

尹曾墓誌無書壽藏者此雖紀實又一例也

虞部郎中晁君墓誌銘

右誌序略銘詳同韓文法曹盧府君夫人苗氏誌

例也而此銘尤詳又同劉統軍碑例也



東京提點刑獄陸君墓誌銘

右誌序略銘詳同虞部郎中晁君誌例也

楚國太夫人陳氏墓誌銘

書大夫人

右誌不書諱同韓文息國夫人誌例也書夫人子

女不繫夫人而曰公子公女公壻又一例也

永嘉縣太君陳氏墓誌銘

集永嘉縣君案夫王  
逢無字不當稱太

右誌不書諱同楚國太夫人陳氏誌例也

宋右千牛衛將軍仲焉故妻永嘉縣君武氏墓誌銘

右誌不書夫姓宗室也書卒曰棄世同謝景回誌

例也序書某官某之妻故某封某氏題書某官

某故妻某封某氏一以故繫封一以故繫妻義  
雖不殊自成兩例也按唐三家及歐尹曾誌婦  
人無書某人故妻者而此書之又一例也題書  
其夫之名同韓文緱氏簿唐克妻盧氏誌例也  
之壽年葬日又一例也

金華縣君

集題云太常博士楊君夫人金華縣君云云

吳氏墓誌銘

右誌不書諱同楚國太夫人陳氏誌例也書其夫  
寶文閣待制常公墓表

右表不書諱不書字不詳履歷而議論以終篇又

一例也



處士征

本作徵避仁宗嫌名改為征

君墓表

右表敘德履而并其同志之友二人者敘之又一

例也

長安縣太君墓表

集作長安縣太君王氏墓誌止仲當據舊本作表不敢改也

書封不書姓

右表不書諱同楚國太夫人陳氏誌例也書君十

四而嫁五十一而老五十六而卒按唐二家及

歐尹曾墓誌無書老者此書之又一例也題不

書姓兄為表也

外祖母黃夫人墓表

書所稱謂

右表不書諱同楚國太夫人陳氏誌例也不書族

出略也

虞部郎中贈衛尉卿李公神道碑

右碑首書贈誥之辭所以榮君之慶施也又一例也

檢校太尉贈侍中正惠一作忠馬公神道碑

右碑首詳書賜號官階勳爵邑謚同韓文劉統軍碑例也

司農卿分司南京陳公神道碑

右碑書履歷而曰官終于司農卿而所更某官某官任終于知陳州而所歷某任某任皆綱而目



之同度支郎中葛公誌例也書世系于序末而尤詳于銘詩中又一例也

贈司空兼侍中文元賈魏公神道碑

書贈書兼書諡又書封

右碑序端不書世系而遠譜略見于序末又一例也按韓文神道碑皆首書世系其不書者清邊郡王碑而已此豈亦是例歟

宋翰林侍讀學士知許州軍州事梅公神道碑  
右碑序略銘詳同韓文劉統軍碑例也

蘇文忠公文九首

墓誌銘五首

神道碑四首



宣徽南院使致仕特贈司空文定張公墓誌銘書特贈非故事也

右誌稱天子之大德而論其所以致太平而得賢

才者以發其端然後敘次其事又一例也特書

三代妣不以妣書而繫其夫書曰娶又一例也

書女已嫁而復歸雖紀實又一例也

銀青光祿大夫滕公墓誌銘書階而已略也

右誌首書始對帝問輒進直言所以著公之見用

以正也銘詩所敘詳在被讒所以惜公之所有

不得盡施也二者皆公生平之大而首末謹書

之雖立言之法亦一例也



王子立墓誌銘

右誌不書姓略也書子曰有遺腹裔紀實也同王

文王逢原誌例也

陸道士

一無

墓誌銘

書道上

右誌不書族出不書葬日略也詳于論其丹學也

李太師墓

集著

誌銘

右有銘無序同韓文試大理評事胡君銘例也

司馬溫公神道碑

此與李太師皆用曹成王例

右碑首敘信順尚賢三德以贊頌天子母后之聖

所以重公之賢也次敘婦人孺子夷狄姦邪亦

皆仰公之德化所以實公之賢也既又敘公既  
葬之後人之哀慕祠祀者四方遠近皆然能致  
乎此公之一誠而已又推公所以爲賢之本也  
三者雖敘公之賢實繫國家之大政故特詳之  
然後敘次其事同文定張公誌例也謹詳奉勅  
之辭同歐文文正王公碑例也

富鄭公神道碑

右碑序景德盟後虜人不敢盜邊者三十有九年  
慶厯聘後北方無事者四十有八年百年之間  
所以四方晏然以休養生息而致太平之盛者



先則寇公之功後實公之功也公方進用之初固已任其大者如此故首書之然後敘次其事同文定張公誌例也謹詳奉勅之辭同司馬溫公碑例也

### 趙清獻公神道碑

右碑敘國家善于用人是非明辨賞罰必信而天子穆然無爲坐收成效此爲治之至要也而公與有功焉故首書之而後敘次其事同文定張公誌例也謹詳奉勅之辭同司馬溫公碑例也

### 太子少師致仕謚康靖趙公神道碑

右碑敘國家有天下六聖一心用仁尚德守之不  
變此宋興百二十有五年四方乂安民物忻戴  
自漢以來太平之盛未之有者由當時公卿大  
臣類多長者相與輔相之所致也而公其一人  
焉故首書之然後敘次其事同文定張公誌例  
也

朱文公文二十首

墓誌銘七首

墓碣銘二首

墓記二首

壙記二首

埋銘一首

墓表四首



神道碑二首

端明殿學士黃公墓誌銘

右誌書贈官不曰贈某官而曰詔以某官告其第  
同尹文故宣德郎皮公誌例也

承務郎李公墓誌銘

右誌首書其致仕誥命之辭同王文贈衛尉卿李  
公碑例也

陳師德墓誌銘

右誌議論以發其端而著科場之弊者所以深歎  
夫聖賢修己治人之方國家禮義廉恥之教不

墓銘舉例  
行同柳文陸文通先生表例也

劉十九府君墓誌銘

書次特例也以其耆藁而名門也故十九府君云也

右誌不書姓名門也題書其第又一例也

直顯謨閣潘公墓誌銘

止書今官簡也

右誌詳書妻之氏諱與字雖妻同葬又一例也

郭得誼墓誌銘

右誌序略銘詳同韓文盧府君夫人苗氏誌例也

銘皆贊美之辭無所敘述同韓文盧渾誌例也

潘氏婦墓誌銘

書婦舅主喪也

右誌題書潘氏婦按唐三家及歐尹曾王蘇婦人



一人題額一人  
撰文猶之一人  
爲序一人爲銘  
耳  
題額之例自  
孔子題有吳  
延陵君子始  
今碑中篆蓋  
題額別是一  
入例無不可

誌題有書某氏妻者矣。無書某氏婦者。此蓋雖

夫請銘而主于舅也。又一例也。

篤行趙君彥遠墓碣銘

表其德特例也。既表其德而官可略也。

右碣書生年同歐文明因塔記例也。題揭其德以

表之。又一例也。而不書官。德重于其一無其學官也。又

一例也。按唐三家及歐尹曾王蘇墓銘非賜

碑則撰文製題皆出一手無別製題者。此云福

國陳公大書其碣之首曰皇宋篤行趙君彥遠

之墓。而子某使人奉狀請銘而刻諸一作于下方。則

撰文製題出兩人矣。又一例也。



司農寺丞翁君墓碣銘

右碣敘君守正不阿而以智全趙氏天下莫不高

其誼慕其名而想見其爲

一無學

人此平生之大節

也故首書之而後敘次其事同蘇文文定張公誌例也既書調某官以母喪不赴又書以少母喪去官所謂少母蓋其生母也而因事見之同李文兵部侍郎贈工部尚書武公誌例也

劉樞密墓記

書墓

右記詳書其生之年月日時又一例也題書墓記

同柳文章夫人墳記例也



范直閣墓記

右記詳書其生之年月日時同劉樞密記例也生

年不書甲子而書釋歲

釋歲謂元默敦祥上章執徐是也

卒年亦然

又一例也題書葬

嘗

記同劉樞密記例也

知縣何公壙記

書壙記

右記書其生之年月日同劉樞密墓記而稍略也

一作題書壙記同韓文女孥壙銘例也

亡嗣子壙記

書亡嗣子重繼嗣也不名同柳小姪女子例也

右題書壙記同知縣何公記例也

女已埋銘

書名書埋

右銘無序同韓文試大理評事胡君銘例也題書

埋銘又一例也

屏山先生劉公墓表

書地書姓示不以官重也

右表有銘詩則雖云墓表實墓誌銘也題不書官

同歐文祖徠先生誌例也

程君正恩墓表

右表議論以發其端而致感歎之意者傷其爲學  
能擇能行而無年以死不得見其德業之所成  
就同陳師德誌例也葬不日略也

曹立之墓表



右表葬不日略也表後有系又一例也

韓溪翁程君墓表

書自號

右表題書其所自號者揭之又一例也

朝議大夫致仕贈光祿大夫黃公神道碑

右碑敘宣和之末弄臣竊柄建取燕雲之策而公

固已有先見之憂已而果召非常之變京城陷

沒眾皆俛首奉賊公獨感憤移檄致事而去雖

不數日竟以病卒然祖宗所以涵養斯人至深

且遠者乃于公少見遺餘也故首書之而後敘

次其事同司農寺丞翁君碣例也不書諱與字

同王文寶文閣待制常公表例也

龍圖閣直學士吳公神道碑

右碑書贈官不曰贈某官而曰有司以某官告其

第。同端明殿學士黃公誌例也

右宋文六家凡一百九首六十八例

宋人製題義例不嚴然其閒亦有變古開新者足以  
備不得已之營度云

墓銘舉例卷之二終